

重修目錄

卷一

輿地志上

星野 晷度附

沿革表

疆域 城池公署附

川澤 橋梁附

古蹟 坊表附

卷二

輿地志下

村莊 市集廟會附

風俗

物產

卷三

田賦志

戶口

地糧

鹽課

雜稅附

卷四

學校志

學宮

學額

學田附

書院

考棚

社學

義學附

卷五

經政志

祀典

禮儀

慶典

倉儲

郵政

養濟院 留養局
惠民藥局 漏澤園

郵政

驛站

郵鋪

兵防

卷六

職官志

封爵表

職官錄

官師表

宦績錄

卷七

選舉志

薦辟

制舉

科目

進士 舉人 貢生 例仕 文職 武職
武進士 武舉

封廕

恩榜

卷八

人物志上

仕績

忠節

遇難附

孝友

義行

文學

隱逸

方伎

附載

卷九

人物志下

列女

節孝 賢懿
貞烈 難貞女

附載

卷十

藝文志

著述

金石

卷十一

雜稽志上

事略

祥異

卷十二

雜稽志下

陵墓

寺觀

識餘

古蹟 坊表附

漢書地理志凡古蹟多列於郡縣名下所以於人往風微之後而寓其監觀興廢之思也大抵聖賢之遺蹟人皆願爭而有之雖附會亦信爲真焉若姦邪之遺蹟則人恆毀滅而絕之雖本鄉亦羞弗齒焉此亦足爲勸懲之助矣豈但撫棠思芟因釣爲臺也哉志

古蹟

舊志載有蓮花池今查其地已撥入吳橋故刪之

古鬲國地

應劭曰鬲偃姓皋陶後羅泌國名紀夏世侯伯有鬲氏以近鬲津名其故鬲城在今德平若兩漢鬲縣

則在德州隋鬲津縣則在樂陵而甯津之臨津亦
因臨鬲津也然國名紀只言夏世侯伯未及於商
按辭尙功鐘鼎款識商器中有鬲甗其文作𠂔又
有鬲父已尊其文作𠂔亦商器或疑爲作器者之
名豈知其爲鬲國之甗鬲侯父已之尊也甯津與
德州德平樂陵皆接壤爲鄰可知爲古鬲國地其
後至周爲鬲氏長源曰南宮中鼎有鬲人引說文
作福𦉳今說文無福字積古齋款識又有鬲攸从鼎皆其
苗裔也

齊無棣邑界

水經淇水篇清河又東北過南皮縣西酈注又東北
無棣溝出焉東逕南皮縣故城南又東逕樂亭北
地理志之臨樂故城也王莽更名樂亭晉書地道
志太康地記樂陵國有新樂縣卽此城矣又云春
秋僖公四年齊楚之盟管仲曰昔召康公賜命先
君太公履北至於無棣蓋四履之所也又無棣溝
分爲二瀆其枝瀆南逕樂陵郡西以上水經酈注
言臨樂樂亭新樂先後同城至明且晰而無棣溝
流經境內卽無棣枝瀆亦經樂陵之西夫樂陵之
西卽甯津也可知無棣正瀆自西而東經甯津北

境而無棣枝瀆又分支南下經甯津東境則甯津
在周時爲齊無棣界地鑿然信矣若無棣故城則
在今慶雲縣東微南五里乃隋就古基而置者與
海豐無棣故城爲宋所置者別

臨樂故城

樂亭故城

新樂故城

按史記趙世家臨樂註正義引括地志曰臨鄉故
城在幽州同安此大誤也明是臨樂豈得以臨鄉
當之且卽以臨鄉論亦在幽州固安又豈容訛作
同安則誤而又誤也大清一統志曰臨鄉故城
在固安縣南五十七里是已豈得誣作
臨樂哉因史註誤故不能不先辯明

舊志曰此爲隋隄俗名耿家圈在縣北三十里

按甯邑自周末趙孝成王以臨樂與燕至漢高帝置
渤海郡遂以臨樂縣屬之武帝元朔初封劉光爲
臨樂侯五傳至王莽篡位絕莽改臨樂爲樂亭水
經酈注臨樂更名樂亭王莽時改也及光武帝更
置州縣而臨樂遂省建安中曹操克南皮復置臨
樂縣又改名新樂縣屬樂陵名雖屢易地則未移
厯晉及北魏孝昌中復置重平縣屬安德而新樂
又裁省至東魏於縣西境胡蘇亭置胡蘇縣並益
以新樂地屬渤海乃至高齊而胡蘇重平併廢未

幾隋興復置胡蘇縣仍兼有臨樂地及重平北境
自唐以後雖小有分割而大局已定矣若其故城
則臨樂樂亭新樂先後一也一統志曰臨樂故城
在甯津縣北爲漢侯國又水經注無棣溝自南皮
縣又東逕樂亭北卽臨樂故城也又晉太康地志
樂陵國有新樂縣寰宇記曰今臨津縣界卽其地
故李兆洛地理今釋亦注云在今河間府甯津縣
北竊觀甯津北境有七星臺鳳凰臺遺址此固非
有國者不能當而耿家圈正在縣北三十里實漢
臨樂故城也舊志稱爲隋隄相傳煬帝曾駐蹕於

此令軍士築隄如垣有耿姓守道守義者進膳帝
嘉之因以所築隄賜名耿村云方輿紀要及通志
亦采其說然漢書建侯正而有據隋隄之說類出
俗傳或者隋因漢城舊基而加築耳如唐張柬之
爲襄州刺史漢水齧城因壘爲隄此之因城爲隄
亦正其例第觀其周垣匝約十五里猶具城形
星臺偏左鳳臺峙右龍潭列前藩封規制昭然可
思也

胡蘇亭址

胡蘇故城

臨津故城

舊志保安鎮本宋臨津地金改保安鎮置土城在縣西南二十五里卽今包頭店

按舊志所云殊欠分曉保安鎮者本秦漢胡蘇亭址東魏天平中於此置胡蘇縣北齊廢隋開皇十六年復置胡蘇縣唐天寶元年改名臨津宋熙甯六年以臨津省入南皮名其地爲保安鎮及宋南渡金復置臨津縣天會六年城圯於水乃東遷今治改名甯津縣其保安鎮卽今縣西二十五里之保店也 大清一統志 畿輔通志歷代地理今釋

並同而時俗耳食者每以縣北與南皮界之臨津店指爲臨津故縣實爲謬妄失察豈知胡蘇亭胡蘇縣臨津縣保安鎮名目雖殊時代雖異實祇一處並無分區史籍具陳可覆按也若臨津店者乃縣境邊鄙村店與鄰封分界之名猶景州東界有吳橋口也而遂謂其城卽在是可乎

重平北境

按高帝五年置渤海郡屬縣二十六其三曰東光以胡蘇亭屬之十六曰臨樂十八曰重平此乃同時所置者胡蘇爲甯津西境臨樂爲甯津東北境重

平爲甯津南境也而甯津三分割據之勢卽於是
定重平者今山東德平與直隸甯津兩縣中分之
古邑也其故城在今德平縣西北三十里重平鎮
俗呼曰重興乃德平邊界再北不遠卽甯津地是
甯津南鄉諸村與德平界者皆古重平地蓋德平
分重平之南半甯津分重平之北半也

永州城

舊志在縣東四十里卽今楊盤鎮

按明一統志 畿輔通志皆以永州城爲隋末置而
舊志竟闕書今據隋書大業十一年詔村隍皆築